

Fu posto, per li ditti, suspender li debiti di sier Alvise Bragadin qu. sier Andrea per do anni, che l' ha a li Governadori et Cazude; et balotà do volte non fu presa per non aver il numero di le ballote che vuol la leze. Ave: 123, 46, 5. Poi: 101, 70, 2.

Fu posto, per li Consieri et sier Almorò Barbaro cao di XL vice consier, *cum sit* che a Rambaldo et Michiel Gratiadio veronese li sia stà fato dano in le soe possession di Engaza sotto Nogara, qual comprò da li Proveditori sora le camere; et per saper la verità di delinquenti sia scripto a li rectori di Verona debano *publice* proclamar, chi quello o quelli acuserà sì che si habbi la verità, habino lire 500; e si uno di compagni acuserà l' altro o i altri, *dummodo* non sia el principal, sia liberà dil bando etc. *ut in parte*. E in dita parte è: *Cum sit* che a uno Benedetto da Borgo citadin veronese, essendo la moier e fioli in villa, vene alcuni con scale per intrar in caxa e rupe porte etc., come apar per letere di sier Piero Trun *olim* podestà di Verona, di 26 Fevver 1523, pertanto sia dà libertà al presente Podestà di Verona che sapendo la verità quelli possi meter in bando di terre e lochi con taia lire 600 vivi et 300 morti, et confiscation di beni in tutti do i casi sopraditti. Ave: 118, 2, 6.

Fu posto, per tutto il Collegio, che per il Collegio nostro sia electo uno avochato a le Cazude con salario di ducati 40 a l'anno a bosoli et ballote, il qual sia ubligato difender le raxon di la Signoria nostra; et ballotà do volte, non fu presa perchè la vol li tre quarti. Ave la prima volta: 130, 57, 2. La seconda: 116, 75, 4.

Fu posto, per tutto il Collegio *ut supra* et li Savii ai ordeni, sicome apar per le letere dil Conte e capitano nostro di Sibinico, la valorosità et optimi portamenti fati per il strenuo Piero Chelmi capo di stratioli, fo fiol dil qu. Condo cavalier, contra li martalossi quando veneno a depredar su quel contado facendo preda di anime et animali in uno loco dito Coocesta, et questo recuperò la preda et amazò alcuni; pertanto, oltra ducati 8 l'ha per paga, li sia dà altri ducati 2 sì che habbi ducati 10 per paga et sia fato cavalier, donatoli una caxacha d'oro, nè fazi spesa alcuna per la cavalaria. *Item*, altri 6 stratioli sono de li, li sia cressuto ducato uno di più per paga. *Item*, Piero Frasina capo di stratioli fo fiol dil qu. Thodaro cavalier, li sia azonto ducati 2 di più. Ave: 175, 5, 1.

176* Fu posto, per il Serenissimo, Consieri, Cai di LX e Savii una parte zerca far redur li XX et XV Savii che reformano la terra per poter dar expedi-

tione la matina e poi disnar sotto pena di esser privi dil Consejo di Pregadi *ut in parte*; la qual se dia meter a Gran Consejo, aziò sia più valida. La copia sarà quà avanti posta. Et sier Piero Marcello è di Pregadi qu. sier Jacomo, ch'è di XV Savii, andò in renga e contradise dicendo è parte molto cruda, che uno haverà lite in palazzo o altro da far e non potrà far i fati soi etc. *Unde*, vedendo il Serenissimo et Collegio che la parte si perdeva, deteno una zonta che tra loro potessero balotar, come è notà di soto, e dar licentia, etc. Et il Serenissimo parloe sopra questa parte longamente, dicendo il bisogno di la terra, qual è intrigata e do anni è principià et non si siegue perchè i non se riduse; con altre parole. Et compito, fo mandati fuora li ditti Savii. Ave 122, 26, 5. Fu presa.

Noto. La compagnia levata novamente di zentilomeni zoveni chiamati i Valorosi, vanno vestiti di veludo cremexin per zorni 10. Eri fono a Consejo, e tutti si levò suso a vederli. Questa matina in Rialto, con trombe e pifari soto la loza per mezzo i Camerlenghi ballono, et cussi per mezzo la botega dil signor di la festa ch'è sier Agustin Foscari. Vanno poi vestiti di scarlato fino il dì dil Corpo di Cristo. È loro cassier sier Almorò Dolfin qu. sier Alvise, qual fe' far uno libro con un moto: *Pretio honorato e degno a Valorosi*. Farano questo anno una festa publica.

Ancora eri a Consejo vene in scarlato sier Marco Antonio Contarini l'avocato, qual ave la pallà, a manege dogal, e poi butò zoso la vesta e ritornò a l'avocataria. *Tamen* la farà per piacer per esser ricco in perpetuo.

A Chioza, in questi zorni, dove è podestà sier Zuan Antonio Dandolo, seguite che alcuni morite da peste; fece gaiarde provision et non fo altro: et fo bandito le barche di Chioza di quà per alcuni di.

È da saper. A Praia si fa il capitolo zeneral di frati di san Benedeto, et essendo stà fato presidente di la religion don Egnatio da Fiorenza, qual *alias* fo deposto per confusion feva in la religion etc. hor lui con li difinitori mandono do frati per oratori a la Signoria nostra con letere soe di credenza, i quali fono don Et exposeno, per la parte presa in Consejo di X con la Zonta che non sii altri che nostri subditi abbati in le terre e lochi nostri di loro monasterii, et pregando si revochasse per non haver tanti frati abeli da far abati. La materia fo tratà nel Consejo di X et preso non li revocar; *hoc non obstante*, feno abate di Praia don